

欽定剿平三省邪匪方略

欽定剿平三省邪匪方略正編卷一百八

庚申年

十月初五日

甲寅

額勒登保奏言竊

臣

前因甘省

之賊未完不能卽撤棧道防兵又慮在川之賊

折回寧羌南鄭故在西鄉之明陽關一帶控扼

相機辦理昨於十九日據差弁探報有一股賊

匪自川省之簡池壩過巴山嶺一路竄入西鄉

罐子山距

臣

駐營之地二百餘里

臣

是夜四鼓

發兵轉由堰口二十日晚間趕過柳樹店連夜偵探賊匪有由罐子山出私渡河之信當令官兵飽餐卽帶同慶成札克塔爾等整隊啟行至私渡河口天甫黎明該匪等在該處空房內分散歇息不料官兵趕到經札克塔爾慶成分路圍截該匪等拋擲器械慌忙逃奔我軍於上下溝坎追殺疊斃賊匪二百餘人餘匪四竄尚有

三四百人攢聚翻山行走慶成等又帶領馬步  
兵勇趕上於樹林中殺斃一百餘人該匪全行  
逃散分兵四路追捕二十一二十二兩日共拏  
獲賊匪五百二十五名口內訊出羅大爲蔣三  
福段從五土夢才大小頭目四人僉供此股賊  
匪係張子聰股內分出張子聰尙在川界因擄  
食不足派令羅大爲楊允貴帶領小頭目男婦

共一千餘人向西鄉一路探聽官兵我等聽說  
經畧統兵已往紫陽料得西鄉無兵所以前來  
等語當將該犯凌遲處死此外二百八十二名  
訊係從賊日久均卽正法其餘附近被脅之男  
婦大小二百四十三名口概行給票釋放奪獲  
大小旗四十四面鎗礮刀矛共一百八十餘件  
據該犯所供約計尙有二三百人未獲然俱散

遁老林已無蹤跡

臣

另派兵勇搜拏並令寨上

團勇等一體跣緝以期淨盡旋接長麟來信知

伍逆餘匪分爲兩股前股曾芝秀帶領矛手四

百餘名及婦女老幼四百餘人已繞入南山之

二郎壩華陽等處奔竄其後股伍懷志所領餘

匪現在穆克登布等追剿已至華坪與兩當沔

縣接壤並稱此次曾芝秀股匪係由總兵德忠

所管白石舖汛地逸出棧東等因刻下德忠緊  
跟追捕汪啟又經帶兵往剿並續接長麟知會  
亦由大峪口帶兵前去當可無虞散漫但不及  
早撲滅官兵多爲牽綴

臣

隨派慶成於軍營抽

撥馬步兵勇二千由城洋捷徑抄入趕擊並以  
該一帶老林過多官兵艱於搜捕又令候補通

判雒昂帶原領之鄉勇前往協剿

臣

復嚴飭穆

克登布等將伍懷志一股趕緊剿殺並屬觀祥  
等所剿零星賊匪亦在沔縣之北黑河一帶或  
與伍懷志餘孽合夥又札知穆克登布等如卽  
時併力剿淨固屬甚善否則逼入沔縣南鄭以  
便臣派兵協力夾擊至臣近因賊匪分路四竄  
所有官兵節經分派各路剿辦臣與札克塔爾  
現帶官兵祇一千數百名暫劄城固之二郎壩



遙爲聲勢以扼川匪折竄南鄭漢南等處至楊  
遇春與恒瑞前由西鄉進擊該處賊匪一聞兵  
至卽遁入紫陽界內楊遇春等帶兵趕往現同  
額勒亨額會合已從瓦房店金山梁緊蹙而前  
該處係馬五張世龍冉學勝張允壽各股竄匪  
分合無定人數較多溫承惠現在平利一帶堵  
截龍紹周殷匪東竄之路慶溥在磚坪一帶攔

剿並據深報徐添德股匪尙在川陝交界似有  
與馬五等合夥之勢目下通計全局楚中白巴  
東竄去之賊聞在房縣一帶此時明亮倭什布  
長齡俱經在彼剿辦且新到之馬隊亦必得力  
况該處三面濱臨大江似可無虞曾芝秀竄匪  
若入五郎一帶臣已派慶成前去又有長麟汪  
啟德忠帶領多兵四面兜擊當可卽了此時江

之北岸水勢漸落固宜緊防而各股匪或又折  
回南鄭沔縣輾轉追逐更不成事應俟穆克登  
布觀祥等將所剿之賊殲淨帶兵前來

臣於南

鄭一帶酌量分兵固守卽深入紫陽安康督率  
趕剿緊截東竄楚境之路俾免蔓延再查德忠  
本係派在棧道堵賊之人乃伍逆餘匪曾芝秀  
不及千人竟敢由該鎮留防處所竄過卽或德

忠自知獲罪已重認真出力剿完此股賊匪亦不能抵其疎防之咎應請

旨將巴里坤總兵德忠革職以昭炯戒俾各該將領

益知儆懼又西鄉紫陽等處賊夥前來侵擾恒

瑞綸布春帶兵剿擊未能全行殲滅

臣

恐本隊

兵力單微派

乾清門二等侍衛巴圖魯吹扎布頭等侍衛巴圖

魯定色鼐帶領黑龍江馬兵一百名隨後饋行  
協力擊剿於本月初九日自木果園起程約四  
五日內可到乃吹扎布等不遵臣指示之路由  
石泉縣渡江自江北漢陰紫陽等縣復渡江而  
南遲十餘日始到恒瑞綸布春軍營似此緊急  
之時率意遲延貽誤軍機理應從重治罪但吹  
扎布定色鼐俱出兵一二次曾經被傷著有勞

續請

旨將伊二人革去巴圖魯名號降爲藍翎侍衛仍留  
軍營効力贖罪嗣後若果超衆出力再行據實  
奏

聞鼓勵奏入

上命軍機大臣傳諭額勒登保曰據奏川匪張子聰  
因聞官兵前赴紫陽令賊月羅大爲等分出一股

向西鄉竄擾額勒登保偵探得信卽帶同將領分  
路圍截殺賊三百餘名拏獲賊匪五百餘名賊目  
四名餘匪遁入老林另派兵勇搜捕所辦甚好其  
竄入南山之伍逆餘匪曾芝秀一股雖爲數不及  
千人但南山一帶半載以來早經寧靜今又被滋  
擾若令竄出平原必至地方復遭蹂躪前據長麟  
奏到朕正爲此日夜懸厪本欲令額勒登保遴派

大員前往協剿今額勒登保因該處雖有德忠江  
收跟蹤追躡長麟亦帶兵前往究恐不能及早撲  
滅致官兵多爲牽綴業派令慶成抽撥馬步兵勇  
二千由城洋捷徑抄入趕擊額勒登保仍暫劄城  
固之二郎壩遙爲聲勢以扼川匪折竄之路所辦  
甚是惟當轉飭慶成督率官兵趕緊奮擊將南山  
竄匪迅速殲盡並飭穆克登布等將竄往沔縣之



伍懷志等股趕緊剿辦其馬五張世龍冉學勝張允壽龍紹周各竄匪亦令慶溥溫承惠實力堵截額勒登保俟騰出兵力亦卽前赴紫陽安康督剿至長齡現已帶領吉林黑龍江官兵迎赴紫陽平利一帶會同慶溥溫承惠等協剿該處竄匪但吉林黑龍江兵丁皆係生力勁旅正宜及鋒而用長齡素未經歷行陣若將此項勁兵徒事往來奔涉

恐又漸形疲乏著額勒登保派員迎赴前途將長齡作爲領隊大臣聽候額勒登保調派於剿捕更資得力至所奏巴里坤總兵德忠縱令曾芝秀竄過棧道請旨革職一節昨據長麟奏伍金柱餘匪翻越白家店山梁係由德忠防守汛地逸出是德忠疎防之罪爲尤重本欲卽將該鎮革職因伊現隨長麟在南山附近一帶領兵協剿賊匪是以未

卽降旨著傳諭額勒登保將德忠革職之處暫緩  
宣示若此旨到時德忠能協同長麟等將會芝秀  
一股卽行撲滅淨盡則德忠從前之罪止於革職  
仍可留於軍營効力如尙有別項出力之處額勒  
登保不妨據實奏明候朕酌奪倘仍前延玩不能  
速行辦竣則其罪不僅止於革職額勒登保卽將  
該鎮調至軍營傳旨革職審訊按例定擬具奏至

吹扎布等係巴圖魯侍衛遇有派委打仗理應迅速勇往今不遵調度繞道遲延甚屬可惡數年以來軍營大臣等從未參奏巴圖魯侍衛額勒登保係吉林人能不徇情面秉公參奏甚屬可嘉吹扎布著退出乾清門與定色彙均革去巴圖魯名號降爲藍翎侍衛留於軍營効力贖罪以觀後效

同日台布奏言竊照陝省用兵以來節年奉發

帑銀千數百萬領銀雖屬戎行易錢總由市肆  
因之銀價日賤錢價日昂而漢南州縣中隔棧  
道錢文更艱於流通民間所用市平轉比庫平  
爲大每銀一兩僅核錢七百數十文及八百文  
不等兵丁夫役口食等項在在需錢零星易換  
市僧不免居奇於兵役大爲不便查嘉慶二年  
興安商州等處曾因錢價昂貴於寶陝局撥錢

一萬六千串解往應用照搭餉之例每錢一串  
作銀一兩於軍需項下提銀歸款經前任藩司  
倭什布奏蒙

恩允造冊報部在案現在漢中錢價亟須調劑

臣謹

於寶陝局提錢五千串委員解送漢中酌量搭  
放以期市價漸就平減兵役均沾利益此後局  
鑄錢文得有成數源源接運俟市價稍平再行

停止奏入報

聞

初八日

丁巳

長齡奏言

臣

日來深慮賊近兵遠惟

恐堵截稍遲加緊趲行官兵極爲奮往於二十

八日已抵竹谿節據差探回報青號一股已由

紫陽入道河竄近川界高家營龍紹周一股由

孟石嶺化龍山東竄距竹谿縣西南竹葉關西

面河卡隘相近又接明亮倭什布來信黃白二  
號一股已由房縣之南山竄入竹山之洪坪似  
有入川之勢又據探報自紫陽竄來一股賊匪  
已至平利之魏家壩洞河一帶滋擾不知賊首  
姓名勢向洵陽白河一帶北竄離白土關六七  
十里各等情

臣

查賊匪雖分股逼近邊卡尙未

竄入楚境沿途悉心訪察楚省之二竹與陝省



之平利安康洵陽白河處處犬牙相錯竹谿之  
西南則有石店河西面河竹葉關三處邊卡俱  
係賊匪往來熟路竹山之西北則有銅錢關西  
垭子吉陽關左季關等處亦屢經闖入若竄進  
竹谿尙在邊隅猶可攔截若由洵陽白河竄入  
竹山東趨則由鮑家店直至黃龍灘下達均州  
襄陽南行則房保南漳興遠均在腹地此路實

關緊要現在明亮倭什布帶領滿漢各兵於房  
縣之關東河一帶追剿自東北而向西南竹谿  
邊卡可以兼顧臣現由竹谿之西北關垵入陝  
省之洵陽董家梁一帶截剿以堵賊竄竹山之  
路免致蔓延腹地並一面咨報額勒登保分兵  
夾擊以期迅速肅事再欽奉

諭旨令臣查訪明亮有無避賊逗遛之事據實密奏

臣

前抵襄陽悉心採訪衆論僉稱明亮帶兵最久軍務原所熟練惟近來年力稍衰心思遲鈍尙有希功之念未免迴護已短致有不得人心之處是以剿辦事宜不能迅速歲事

臣

此次分

道進剿未能見面聞明亮近日頗知畏懼於追剿餘匪尙屬認真並無避賊逗遛之事一切剿辦遲延誠如

聖諭實由不能振作之故荷蒙

皇上格外姑容嚴加教訓稍有天良必當盡力圖報

且經畧額勒登保近在平利臣亦相離不遠又

與倭什布合爲一處兵力不薄諒不敢再有疎懈之處自取重戾奏入

上命軍機大臣傳諭長齡曰長齡於前月二十八日奏稱西鄉屯聚各匪有一股竄入紫陽縣境又龍

紹周亦竄入紫陽之東陝省情形重於楚省帶兵  
由保康取道二竹前往陝境會同慶鴻溫承惠并  
力剿辦已隔十日本日報到朕以爲長齡必係迎  
禦紫陽竄匪及龍紹周一股督率勁兵奮力剿殺  
具奏打仗得勝情形及加披閱尙在竹谿一帶取  
道行走並未遇見一賊接仗一次而摺內尙稱官  
兵加緊趲行極爲奮往若果長齡行走迅速豈有

日久總未遇賊打仗之理長齡所帶吉林黑龍江官兵俱係勁旅且有粵省兵一千名足資剿賊之用乃轉欲在洵陽董家梁一帶堵賊竄入竹山之路竟係有心取巧擁兵自護若迅速赴紫陽一帶將龍紹周等股痛加殲戮以剿爲堵則賊匪又何能東趨入楚耶長齡在京時於朕前頗形踴躍奮迅乃自抵楚以來不過節次奏報行走路程總未

趕上賊匪打仗似此觀望遲延虛糜兵餉轉瞬卽  
屆沍寒又得以冰雪凝滑藉詞掩飾賊匪何時始  
能辦竣不又爲那彥成之續乎至所稱明亮近來  
年力就衰心思遲鈍尙有希功之念未免迴護已  
短不得人心近日頗知畏懼等語所論尙是明亮  
係久經帶兵出力之人今因年力就衰不能振作  
經朕屢次嚴飭尙知畏懼長齡正當壯盛之年又

係甫經帶兵寧轉不知畏懼出力乎昨已諭令額勒登保派員迎赴前途將長齡所帶官兵卽行接管歸入經畧軍營長齡作爲領隊大臣聽候額勒登保調派長齡於未奉此旨之前在途次遇賊得有勝仗仍當自行具奏如祇係沿途行走毋得再行發報徒勞驛站若業經歸入額勒登保軍營自當受經畧節制卽派出打仗得勝均當報明經畧



具奏以符體制

初九日戊午德楞泰勒保奏言查青號分股賊目

王珊自大寧老林駁同趙麻花一股轉回欲向

太平迎徐添德來川在大水田地方被官兵將

前股趙麻花截殺淨盡王珊卽向雲陽折竄經

該縣梁敦懷率勇堵截又復竄往高陽臣等因

太平一帶現有七十五一路官兵在彼可以截

其竄陝之路而溫湯井等處地勢險窄亦有路  
可通老林當派副將褚大榮帶兵扼住要隘

臣

德楞泰督同賽冲阿等過南溪河由元灘一路

追躡

臣

勒保督同溫春等由江口至脾埡口一

路兜截

臣

德楞泰於二十三日午後至開縣之

禮復山探知賊於是日早間已由該處起身當

卽連夜督兵追逐至二十四日申刻趕至大茅

坡正值賊匪在彼造飯一見官兵卽紛紛奔潰  
我兵奮勇追殺至磨子巖時已昏黑斃賊一百  
餘名生擒賊目鍾應昆等九十三名訊據供稱  
王珊在濫泥溝身帶箭傷不能行走經官兵連  
戮兩矛斃命當卽查驗屍軀割取首級認明屬  
實餘匪尙有二百餘人出郭家坡折竄維時  
臣  
勒保聞信卽督同溫春等於二十五日抄至巫

山坎截擊詎賊匪探有官兵又向入廟橋奔逸  
經新寧縣保全寨等處團勇截殺斃賊二十餘  
人生擒三名團勇亦有傷亡二十六日巳刻我

兵追至觀音槽

臣

勒保卽同溫春等帶領馬隊

趕上直前衝殺賊衆大潰滾巖跌斃並殺死者  
二百二三十名生擒旂首傅有萬等五十七名  
內有王珊之師李思槐係徐添德徒弟衆稱爲

四老師父又經天元寨軍功團勇喻永福等搜  
獲劉顯壽等八名查此股賊匪本祇有四百餘  
人茲連次殺斃二百五六十人生擒一百六十  
一名口首逆王冊業經殲斃其師李思槐亦已  
被擒首夥剿淨川東實已肅清當將李思槐寸  
磔梟示賊目鍾應昆傳有萬凌遲處死從賊曰  
久之陳友富等一百五名均卽正法惟被擄未

久之向思得羅李氏等五十四名口酌給銀米

遞籍省釋

臣

等原思辦完此股之後川東川北

腹地已無賊匪惟張子聰劉朝選湯思蛟等各

逆在太平大寧老林內潛匿所剩賊匪無多先

派總兵永寧託雲泰等帶兵進山搜捕

臣

等亦

當卽赴太平一帶督辦以期川省全數肅清再

剿陝西邊界之賊緣據署通江縣徐廷钰稟報

有李炳陳朝官夥內賊目朱九齡帶有三四百人由陝竄至平溪壩經該縣督率壯勇迎擊殺死並淹斃八九十人正欲過河追剿復有陝西竄來張添倫張世龍齊國謨等餘黨千餘由金溪河溝口突出當卽率勇衝殺斃賊一百五六十人生擒僞總兵魏超賊目王三級李惠等十三人投出龔序賢等一百五十餘人訊知該匪

等在南鄭黃官嶺被經畧額勒登保一路官兵  
打散由羊圈關竄入川境隨後尙有李炳陳朝  
官與楊開甲餘黨由灰灘等處竄來賊勢較多  
該縣請派兵剿捕並稱此次打仗軍功首領郭  
俸殺賊最多左目被賊矛傷壯勇亦間有傷亡  
又據署巴州田文煦稟報陝省竄來賊匪四出  
滋擾闖入該州所屬伍家河經元山寨團勇堵



禦殺賊二十三名現仍折回通江並據劉清探  
報各股竄匪現因通巴境內寨硎堵禦嚴密無  
處掠食欲由廣蒼一帶竄越嘉陵江各等情

臣

等伏查自陝竄來各股匪衆被經畧一路官兵

節次痛剿均係敗殘餘孽剿賊大局

臣

曾與額

勒登保彼此札商如果將陝甘之賊全數遁入

四川官兵併力圍攻而川省各州縣寨硎自

年夏間經<sub>臣</sub>等遵

旨籌辦堅壁清野鄉團各勇極爲奮勇出力剿堵自

易得手今川東腹地已清陝匪甫入川境正可

騰出兵力馳往川北截剿<sub>臣</sub>等現卽取道營渠

至保寧一帶隨探隨進先行顧住嘉陵江西面

相機剿辦以冀速就殲除至七十五一路官兵

前令其在大平一帶堵剿昨據報稱於太平之

雙石子地方遇見劉朝選夥內打散餘匪數十

名卽行擊斃二十餘名生擒王士友等五名緣

聞通巴又有陝匪各夥竄入亦欲移師往剿第

思川北一路既有臣等前往剿辦而龍紹周一

股聞經溫承惠由紫陽截回且徐添德又有回

川之說東北面不便空虛臣等已知會該提督

卽由太平至通巴東北一帶偵探賊蹤帶兵截

剿夔巫一帶防堵事宜現派副將褚大榮前往  
接管嘉陵江西岸嚴飭總兵許文謨副將趙得  
功並專責防堵之道府各員督率文武兵勇實  
力嚴防奏入

上命軍機大臣傳諭德楞泰勒保曰王珊一股匪衆  
經德楞泰勒保督率將領分路兜截奮勇追殺斃  
賊一百餘名生擒九十三名王珊身帶箭傷經官

兵戡斃餘匪向入廟橋一帶奔逸復經勒保帶領  
馬隊趕上衝殺斃賊一百二三十名先後生擒六  
十八名內有李思槐係王珊之師當卽寸磔梟示  
並將其餘賊目分別凌遲處死此次連獲大勝仰  
荷

天恩益無涯涘叩感之餘實深敬畏王珊股匪本祇四  
百餘名業經殲擒淨盡不留餘孽現在川東腹地

實已肅清所辦甚屬可嘉且據稱與額勒登保彼此札商欲將陝省之賊全數逼入四川以便併力圍攻等語覽奏更爲深慰數年來陝甘四川湖北各股竄匪雖疊經官兵痛剿但賊情狡猾奔竄靡常而各省帶兵大員又不免各存意見僅將該省之賊驅逼出境卽爲了事不復顧及隣省其隣省帶兵之員亦復如是賊匪輾轉奔竄日就蔓延最

爲軍營惡習現在陝省之賊如能逼歸川省剿辦較易此等情形朕所稔知今德楞泰勒保能見及此籌慮大局可謂無分畛域方不愧大臣任事之道德楞泰著賞給白玉帶頭綠玉喜字搬指大小荷包勒保著賞給綠玉喜字搬指大小荷包用示優獎又發去翎管搬指及搬指套各十個一兩重銀牌五百面五錢重銀牌五百面著德楞泰勒保

分賞在事出力將弁兵丁俾咸知感奮現在額勒  
登保駐兵城固一帶陝省各股賊匪勢俱逼向西  
南德楞泰勒保統領勝兵取道營渠前往保寧一  
帶先顧住嘉陵江西面以期與額勒登保等兩面  
圍攻所辦甚是嘉陵江一帶防守最關緊要現據  
奏各股竄匪因通巴境內寨硐嚴密無處掠食欲  
圖竄越若嘉陵江防堵不嚴又致偷渡擾及川西



完善地方更復成何事體德楞泰等務須加意防範嚴飭許文謨等實力攔截不可稍有疎虞看來川省近日團勇事宜尙屬認真辦理各州縣寨砦頗爲得力可收堅壁清野之效德楞泰勒保若能與額勒登保將陝省竄川之賊卽在川省悉數剿除廓清全境以伸五年來朕之夙願仰慰

皇考在天之靈功大賞崇當同心加勉也至張子聰劉

朝選湯思蛟等股俱在太平大寧老林內竊匿已  
派永寧託雲泰前往搜捕德楞泰勒保當轉飭七  
十五就近督剿此等雖係剿敗餘匪爲數無多然  
必須殲除淨盡當責成永寧等上緊搜剿勿令竄  
往他處別有裹脅爲要署通江令徐廷鈺率勇堵  
禦連次擊斃竄匪實爲奮勇可嘉著加恩賞給知  
州銜以應陞之缺陞用其殺賊最多之軍功首領

郭俸亦屬出力伊如願出仕卽加恩以外委拔補  
否卽賞給八品頂戴榮身以示鼓勵此時川東地  
方已就肅清而楚省藍黃線等股俱有西竄之勢  
經明亮等在房縣等處截剿緊急難保不又逸出  
楚境竄入川東所有夔巫一帶防堵事宜業經德  
楞泰等派令副將褚大榮前往接辦務須飭令該  
副將在彼率領兵勇認真堵截如楚省竄匪闖入

卽當與明亮等兩面夾擊勿令再有竄逸至此時  
川省軍營連獲勝仗而額勒登保等卽日將陝境  
之賊上緊逼剿勢必併歸川北一路軍威更爲壯  
盛勝兵所到之處賊匪等窮蹙畏懼自必紛紛乞  
降德楞泰勒保當察看光景如果賊匪誠心投出  
自應允准受降但賊情狡詐不可不加意嚴防恐  
該匪等被大兵剿急計無所出相約詐降勾結轉

爲大營肘腋之患此最應隨時留心者德楞泰勒保尤當慎之又慎也

十一日庚申長齡奏言臣於途次接據陝西平利

縣任奎光稟報竄匪高二馬五現由大貴坪蔡家河炭河等處東奔已飛稟慶溥溫承惠分兵

追剿恐其竄入楚省等情臣細詢隨營知府周

季堂據稱該匪既向東奔則由洵陽之銅錢關

大營盤七里關入竹山之北境必得抄往迎截

方免竄越之虞

臣

卽督率勁旅改由小道並催

趙兩粵官兵遄行於初二日未刻卽抵竹山之

界嶺探得該匪屯聚洵陽之王家坪一帶

臣乘

其不備分派滿漢官兵爲三路令侍衛特依順

保並吉林黑龍江協領佐領驍騎校等官分帶

馬隊又派叅將雙福等分帶步兵

臣

督率各侍

衛章京等帶領官兵居中策應三路接續馬步  
並進直撲賊之大隊該匪不知官兵突至情形  
慌亂卽紛紛各據山梁分投抗拒

臣

細揣賊勢

惟有正西之大山賊勢較衆必有首逆在內卽  
催令中路馬步官兵及鄉勇等繞道搶上山梁  
賊匪拚命抵敵吉林索倫馬隊鎗箭本好馬又  
得力奮勇衝撲立時殺斃二百餘人北面山梁

賊匪見我兵得勢卽分兩股抄襲後路

臣

派參

將海麟遊擊拉里等率領步兵遠用大礮近放  
聯環鎗箭並發殲斃七八十名適左右兩路馬  
隊又已抄上山梁直往下壓賊匪情急四散奔  
竄三路馬隊乘勢追殺二十餘里沿途坡溝斃  
賊又有三百餘名生擒一百餘名該處山徑險  
窄紛歧時已昏暮卽於該處紮營當將獲犯彭



大順等審訊據供我等三十五人俱在陝西四川住家此股大掌櫃且高二馬五前月在安康之銀硃壩被楊提督官兵殺敗卽由小路竄入不利魏家壩地方探付官兵俱在西南邊界東路並無官兵堵截大掌櫃商量楚省年成尙好糧食容易卽向大貴縣一路奔入洵陽今早趕到王家坪原想擄些糧食卽由銅錢關竄入竹

山之界嶺就可活命我等俱拜高馬二掌櫃爲  
師我與王必貴王四現當衝隊頭目張仁李二  
虎俱係探馬其餘徐大武等都是戰手屢經打  
仗統共有六七千人探聽新來官兵已往竹雞  
平利實不料官兵從此路抄來今日被殺戰手  
及受傷者甚多他們此時逃往何處實不知道  
等語該匪等俱係正賊當卽正法其餘男婦大

小季正興等八十七名口係陝西被擄良民各  
釋放回籍又探得該匪現向東北陝省洵陽之  
仁河大小金河一帶逃竄查此路直向東南則  
由白河之鮑家店可竄楚省之黃龍灘下達均  
穀臣已飛咨棧什布就近嚴飭地方官實力堵  
禦而黃龍灘一處尤關緊要臣此時若跟蹤追  
剿反在賊後惟有踣探捷徑迎頭堵截兼護楚邊

並接慶津來信已由安康之四溝壩向西北一

帶兜剿臣現由東北迎截更可夾擊萬不敢予

賊以暇致有遲悞此次打仗兵勇間有損傷查

明另行咨部奏入

上命軍機大臣傳諭長齡曰高二馬五二逆狡詐異常奔越數省屢次戕害提鎮大員較之首逆徐添德輾轉逃竄尤爲可恨今長齡探得該匪屯聚洵

陽之王家坪一帶分派滿漢官兵同時並進直撲賊匪大隊奮勇衝殺殲擒賊匪七百餘名吉林黑龍江官兵初次遇賊接仗卽獲大勝所辦可嘉之至長齡著交部議敘並頒發一兩重銀牌五百面五錢重銀牌五百面著分賞打仗出力官兵以示獎勵前因長齡素未經歷戎行領帶勁兵恐難得力會降旨令額勒登保派員迎赴前途將長齡所

帶官兵卽行歸入額勒登保隊內長齡作爲領隊  
大臣聽候調撥今長齡截剿賊匪打仗得勝軍聲  
已振此時賊鋒大挫正當乘勢搜捕長齡又未便  
遽離該處現已降旨諭知額勒登保毋須令長齡  
帶領勁兵前赴大營所有高二馬五一股賊匪卽  
責成長齡帶領勝兵協同慶溥溫承惠併力剿辦  
務將此股逆匪在洵陽地方速行剿淨如能將該

二逆生擒著卽在該處凌遲鬻割致祭前此被害  
之施紹札勒杭阿王文雄等以慰忠魂而伸衆憤  
或臨陣殲斃亦須驗明確實均著由六百里加緊  
馳奏朕必將伊三人立加重恩如不能卽時剿滅  
亦應逼向西面以便額勒登保迎頭截擊或向西  
南逼入川境斷不可令其折竄楚省二竹一帶亦  
不可令其越過漢江西北逸入商維等處致搜捕

又稽時只總須將此股迅速剿除淨盡若賊已垂  
敗不可又棄而之他如那彥成前此不將高馬餘  
孽剿竣貽累至今也

上又命軍機大臣傳諭額勒登保曰前因吉林黑龍  
江兵丁皆係生力勁旅正當及鋒而用長齡素未  
經歷行陣降旨諭令額勒登保派員迎赴前途將  
長齡所帶官兵歸入額勒登保隊內長齡作爲領



隊大臣聽候調派本日據長齡奏到途次接平利縣稟報並詢知高二馬五一股賊匪由大貴坪一帶東奔長齡隨改道前往截擊共殲擒賊匪七百餘名高二馬五二逆於賊黨中最爲兇悍屢經戕害官兵損失提鎮大員今長齡能痛加剿殺軍威大振已降旨命長齡會同慶溥溫承惠實力剿辦額勒登保接奉此旨竟可不必派員迎調所有此

項吉林黑龍江兵丁仍著長齡帶領以資剿捕再  
額勒登保現在剿辦之賊爲數無多卽日辦竣後  
亦應帶兵前往督同長齡慶溥溫承惠等相機截  
擊並著將現在剿辦情形及長麟所辦曾芝秀一  
股目下曾否剿除淨盡一併據實具奏

欽定剿平三省邪匪方略正編卷二百九

庚申年

十月十二日

辛酉

額勒登保奏言據楊遇春等呈

報帶兵追截賊匪於九月二十二日黎明至安

康縣屬之麻柳壩見民房外有白旗數桿騾馬

數十匹隨即分兵兜圍屋內之賊持矛四出悉

數殲擒共計五十一人訊之活賊始知俱係賊

探在彼歇息造飯據稱馬五王廷詔冉學勝張

世龍等股合夥人數衆多在銀硃壩一帶屯紮  
徐添德一股又在鐵爐壩相隔約二十餘里楊  
遇春與格布舍豐紳喜明等會商將馬步兵勇  
分爲三路又知會總兵馬玉魁帶領官兵並原  
任總兵遊擊長春覓道截斷鐵爐壩之路就近  
先向銀硃壩剿殺午間趕至銀硃壩山梁果見  
順溝十餘里內俱係賊匪我兵抄前斷後並從

中下壓該匪始猶鳴鑼號召經巴圖魯侍衛將  
領等率兵衝入立斃賊匪二百餘名賊隨順溝  
翻山奔逃隨處兜截緊追二十餘里直至吳家  
河沿途斃賊約四百餘人先後生擒男婦五百  
七十餘名口時已傍晚且山勢過大不能再進  
甫經駐營探報鐵爐壩有分出之賊已遇馬玉  
魁等接仗楊遇春與格布舍趕撥馬步兵七百

餘名策應賊匪折奔趕殺八十餘名將及初更  
馬玉魁等亦卽歸營於獲賊內訊出大頭目郭  
合左清明李其舉柯如德四名令將首級指認  
又查出僞副元帥徐二貓大頭目張誠詹如貴  
首級郭合等僉供此股賊匪元帥係馬五老掌  
櫃係王廷詔并有冉學勝張世龍前來合夥所  
殺之徐二貓卽係馬五老之副帥我等是大頭目

徐添德昨在深溝與馬五等會見囑令在前行  
走伊在後抄截官兵所以尙在鐵爐壩其餘訊  
出實在賊匪二百三十三名已同郭合等悉行  
正法附近被擄之人概行釋放楊遇春一面由  
安康一帶趕剿馬五王廷詔等賊一面知會恒  
瑞額勒亨額等探蹤抄擊西竄之賊嗣又據額  
勒亨額報稱二十四日賊由芭蕉口竄出該副

都統率兵起剿斃賊五十餘人拏獲鄭德平等  
十七名訊係楊遇春等剿敗之賊已從西遁有  
奔雙和塘一帶之勢額勒和布額帶兵仍防守原  
卡並接據恒瑞札稱二十四日晚在雙河溝口  
紮營有賊一股撲近營盤恒瑞同綸布春等出  
營迎擊斃賊三十餘名賊卽奔竄天晚不能趕  
拏探得北殺賊匪向全河口而去是夜整兵於



二十五已刻趕抵全河賊之踞淺過河者已有  
大半恒瑞同綸布春九十等緊跟追擊斃賊一  
百餘名緊追過河翻越兩重大山又斃賊八十  
餘名生擒唐國安龔文貴等三十七名訊出探  
馬頭王貴據供此股賊匪係湖北竄來之徐添  
德并有馬五營內剿潰之賊在內當俱正法該  
匪現從星子山逃竄恒瑞帶兵由箭桿山巴山

林一帶抄剿又據溫承惠稟稱上月二十日龍  
紹周股匪由金雞坪一帶翻化龍山東竄該司  
帶領兵勇由曾家壩白沙河等處攔截該匪由  
謝家灣竄來守備王英等帶勇趕剿鎗斃賊匪  
五十餘名賊匪慌亂過河淹斃者甚多餘匪四  
散二十四日帶勇至文彩溝賊衆竟來迎拒千  
總銜李連貴率勇持矛衝殺斃賊二名賊匪過

衆身受矛傷七處陣亡鄉勇亦有傷亡溫承惠  
同王英等督勇奮力趕擊賊匪始退追殺十餘  
里斃賊六七十名該司恐此一帶東南有通竹  
谿之路現往攔截又據劉之仁稟報二十六日  
探有伍逆餘黨八九百人由寧陝廳之火地嶺  
奔入銀杏壩銅錢峽等處該鎮恐賊東竄卽於  
江岸抽調官兵四百七十餘名同候補叅將普

德趕赴池河松樹壩迎頭截擊仍飭江岸各卡  
加意嚴防孰料該匪知後有官兵追擊捨命狂  
奔該鎮已截其東去之路賊匪全行折回柳溪  
徑出江岸該鎮翻山由九店埡跟剿二十七日  
黎明在途次接據探報賊匪於二十七日四更  
時竄至長尾溝突撲柳溪江岸營卡遊擊李有  
貴鎗礮並發賊匪又轉向後山齊執火炬下壓

燃燒卡房李有貴黑暗之中帶兵搶上山梁率  
兵放鎗抵禦賊匪乘間搶過江之南岸李有貴  
右手帶有矛傷兵勇間有傷亡實因防江之兵  
已經抽出一時不能截住迨至該鎮二十八日  
趕到並候補通判雒昂率勇到時賊已遠遁該  
鎮現仍在江岸嚴堵等情查曾芝秀闌入南山  
時人數原屬無多恐有滋蔓且慮南山有賊引

線西紫之賊不無覬覦過江是以於長麟督率

汪啟等追剿之外臣又派令慶成率兵二千餘

名由城洋一路前去抄截乃該匪狂奔疾走於

追兵未到之先竟思東竄幸劉之仁於江岸抽

兵攔截賊於黑夜奪路過江守卡兵單未能痛

殺亦屬實情該匪於三十日逃赴王黑壩大石

川向南晝夜竄遁而南山已經肅清官兵庶無

牽綴

臣

已分檄楊邁春等卽行乘勝於安康界

內會同慶溥上緊趕擊而溫承惠平利一路所  
帶只係鄉勇亦經飭知不在貪擊賊匪而在杜  
其竄楚之路又查穆克登布與觀祥等所剿之  
伍懷志及零星餘匪已經合夥所剩不過千餘  
人先據該鎮等具報在畧陽附近搜剿日內未  
接稟報復飛飭上緊分投兜截務於數日內剿

竣斷不許再有延蔓計目下紫陽安康一帶之

賊較重臣必須親往督率剿辦方爲有濟是以

臣卽帶同札克塔爾自城固之二郎壩起程初

三日已抵西鄉之柳樹店但思南鄭寧羌一帶

防堵不密倘各股賊匪又經被剿折回則勢又

散漫且此時防堵之處非比從前之道路綿亘

臣一面飛行知會長麟定住等卽各帶原兵前



來酌量安設聞賊成業已過江倘數日內長麟  
不能趕到慶成前來卽將一切堵剿應辦事宜  
告知慶成以便與長麟會商安設卡隘嚴加堵  
禦務絕賊匪折竄之路至臣深入紫陽安康等  
處仰仗

天威能將各匪全行剿淨更爲欣幸倘有餘股或致  
竄楚或致入川臣臨時惟當權其緩急輕重酌

量辦理總之曰下賊勢實形殘敗聚則方爲大  
股散則無非小股而且著名頭目東遁西逃或  
在此股或在彼股亦無定向此時各路領兵人  
員亦不在急獲頭目惟能人人出力遇賊緊剿  
黨與既淨頭目亦難獨存

臣躬膺

任使惟當策勵各路大小官員嚴明賞罰俾共圖迅  
速肅事再本年二月內總兵冬爾濟扎普在三

谷河陣亡所有隨同陣亡各員臣謹查明開單

奏口請

旨賜卹奏入

上命軍機大臣傳諭額勒登保曰此次額勒登保分  
飭楊遇春等剿辦馬五王廷詔冉學勝張世龍合  
夥賊匪多有斬獲又恒瑞綸布春等迎擊徐添德  
及馬五營內剿潰之賊亦有殲擒其龍紹周一股

亦經溫承惠奮力趕擊截住賊匪竄往竹谿之路  
合計各路殲斃擒獲賊匪共有一千六百餘名所  
辦俱屬認真可嘉著賞給額勒登保黃面貂皮馬  
褂一件楊遇春烏雲豹馬褂一件札克塔爾舒倫  
馬褂一件慶成天馬馬褂一件並發去一兩重銀  
牌五百面五錢重銀牌五百面分賞打仗出力官  
兵以示獎勵至所稱伍逆餘黨曾芝秀一股竄過

漢江南岸南山已經肅清此實意外之喜南山一帶向爲賊匪逋逃之藪該處山逕險仄林深箐密官兵入山搜捕甚爲費力且恐爲所牽綴今於慶成等未到之先該匪狂奔疾走欲思東竄經劉之仁抽兵攔截賊匪於黑夜奪路過江劉之仁雖不能截住殲擒然不令其直前東竄逼過漢南功過足以相抵至遊擊李有貴於曾芝秀突撲柳溪江

岸營卡時施放鎗礮賊匪轉向後山下壓李有貴  
於黑暗中帶兵搶上山梁賊匪乘間搶過漢江南  
岸李有貴實因防江之兵已經抽出一時不能截  
住該遊擊又帶有矛傷尙非畏縮者可比劉之仁  
李有貴尙可免其治罪此時該鎮等仍在江岸防  
堵江水日見淺涸賊匪既可南竄亦可北竄尙南  
竄之賊復令北竄過江則劉之仁李有貴疎縱之

罪甚大著額勒登保傳知該鎮等令其實力嚴防  
不得稍有疎虞致干罪戾目下紫陽安康一帶賊  
匪較多額勒登保帶同扎克塔爾取道西鄉前往  
督辦所見甚是其南鄭寧羌一帶額勒登保已咨  
會長麟定住等各帶原兵前來酌量設卡並令慶  
成與長麟會商妥辦調度悉合機宜額勒登保當  
知會長麟定住慶成於陝省西南一帶分設卡隘

嚴密防禦務絕賊匪折竄之路至沿江一帶現屆  
冬令水落之時尤應加意嚴防勿任賊匪躡淺偷  
渡北岸又據稱現在賊勢日形殘敗著名頭目東  
運西逃亦無定向各路領兵人員不在急獲頭目  
惟能遇賊緊剿黨與已淨頭目亦難獨存等語尤  
爲扼要之論前此領兵大員總以擒獲一二首逆  
希冀邀功置餘匪於不辦以致敗逃之賊仍推一



入爲首暴脅蔓延又成大股數年以來未能蕩平  
教匪實由於此若將賊匪黨與殲淨則首逆勢孤  
何難卽時就獲此等機宜朕已屢經降旨通諭軍  
營令額勒登保遵照妥辦已操勝筭此時額勒登  
保帶同札克塔爾親往紫陽安康一帶督剿聲威  
壯盛想此等殘敗賊匪無難一鼓殄除額勒登保  
務於年內將各股賊匪悉數殲擒奠安黎庶伊等

早成一日之功朕亦早減一日之過但額勒登保  
又不可因欲迅速蕲事辦理稍有草率務使餘孽  
勿至復萌地方永臻寧謐方爲盡善至賊匪見官  
兵勢盛圍剿日逼自知不能逃竄相率乞降冀延  
殘喘其有臨陣棄械投誠悔罪者自當予以一綫  
生路然當此大兵痛剿之時成功在即斷不可先  
存招撫之見總當以剿爲主俟賊匪畏懼懾伏實

心投順再行議撫方爲正辦昨長齡奏在洵陽地方迎擊高二馬五一股賊匪獲有勝仗已降旨諭知額勒登保不必派員迎調吉林黑龍江勁兵仍令長齡帶領與慶溥溫承惠併力合剿高二馬五一股賊匪此時楊遇春亦已帶兵追躡若將此兇悍賊匪悉數殲除其餘剿辦更易爲力看來紫陽安康各股賊匪勢已窮蹙非東竄入楚卽南竄

入川額勒登保大兵一到能將各股卽於陝境剿盡實所深望否則與其令賊入楚毋寧令賊入川楚省兵力無多明亮年已衰老倭什布帶兵亦難倚恃恐賊匪一經竄楚又致蔓延棘手川省有德楞泰勒保大兵在彼賊匪竄合一處兩面夾擊正可聚而殲洗總在額勒登保斟酌機宜妥爲調度再摺內稱穆克登布與觀祥等所剿伍懷志及零

星餘匪日內未接稟報想未得手此等零星竄敗  
之賊易於剿捕穆克登布等在畧陽附近搜剿何  
以日久尙未殲盡著額勒登保嚴飭迅速剿辦不  
可再有遲緩所有文彩溝打仗陣亡之千總銜李  
連貴著咨部賜卹

同日

上諭內閣曰額勒登保奏查明本年二月內隨同總

兵冬爾濟札普等在三岔河陣亡各員請卹議卹  
著照所請驍騎校部委佐領阿爾松阿瑚可慎領  
催部委防禦富克金布阿達那協領那全佐領那  
敬全福防禦倭克濟那協領盛往防禦世襲雲騎  
尉德昌驍騎校南山拴柱薩勒杭阿前鋒藍翎委  
官佛爾果布叅將郭承緒都司劉振邦守備馬昌  
傑趙天相宋顯玉千總陸喜把總朱宗貴李永田

繼秀俱著交部議卹

同日姜晟奏言臣接准倭什布來咨川匪已由

房竹邊界洪坪馬鬃嶺竄往四川大寧境內所  
有房縣邊境陰條嶺五墩子年旺壁馬鬃嶺等  
處經倭什布就近分派將弁兵丁嚴行堵守臣

一面諄飭該府縣等此時邊境肅清正當趕緊  
團結練勇著落首領分別管帶訓練造具清冊

無事則各安本業設有鄰境殘氛逼近一呼雲  
集分防堵剿到卡之日給與口糧以本地之勇  
防本地之邊自必倍常得力至二竹與陝省平  
利洵陽交界處所賊股紛紛竄近現在鄖陽府  
王正常督同該縣及營員等厚集練勇協同防  
兵固守聞長麟於初三日前抵洵陽又接陝省  
藩司溫承惠來稟與守備王英奮力夾擊似各



匪距楚較遠

臣

定於初十日起身由鄖陽查勘

以至竹谿俟取次勘明應如何籌辦邊防之處

奏請

聖明訓示辦理奏入

上命軍機大臣傳諭姜晟曰據奏接准倭什布來咨  
川匪已由房竹邊界竄往四川大寧境內二竹與  
陝省平利洵陽交界處所賊股紛紛竄近等語此

時川匪既經明亮等追剿出境川省又無後來之賊明亮自必帶兵趕赴大寧剿辦更可無慮賊匪折回滋擾是房縣邊境業已肅清惟該省二竹與陝省平利洵陽在在毗連昨高二馬五卽欲由平利大貴坪東奔經長齡帶領吉林黑龍江勁旅痛加截擊殲戮多名長齡恐賊匪由白河之鮑家店竄入楚省之黃龍灘已飛咨倭什布就近嚴防是

此一股賊匪較多奔竄靡常二竹邊防最關緊要  
姜晟業經預爲籌備所辦尙是前此該督將續收  
落後粵兵七百餘名已交總兵德昌帶往二竹防  
守川匪現又出境倭什布孫清元並無剿捕之事  
亦可會同經理姜晟等務須擇要設卡督率文武  
嚴密防範斷不可使陝匪一名闖入姜晟係該省  
總督俟將二竹邊防籌辦妥協仍當回省辦理地

方事務

同日台布奏言臣前因大兵分剿各股竄匪城

洋西石一帶糧運最關緊要分派道府督率州

縣間段存貯以便隨營接濟臣復親自巡查催

饋行抵二郎壩值額勒登保福寧前來當卽詣

營面商適奉

欽此臣前赴西寧臣查大兵分剿正在喫緊之時

鹽菜等項均係刻不容緩新任撫臣陸有仁到

漢尙須時日

臣

自應將各路鹽糧妥爲安頓再

行起程惟現在漢局存項不敷支放不得不酌

量緩急通融散給是以將各路鹽菜截至九月

底止悉數找清餘銀二萬兩交與額勒登保軍

營作爲十月分鹽菜仍飛催西安省局一俟晉

餉入境立即撥解漢中應用此外各州縣應領

運脚採買等項銀兩

臣

本係逐款查核前後牽

扯給發興安府各屬至七月底止應找銀十四

萬二千餘兩漢中各屬至八月底止應找銀八

萬八千餘兩計兩府十七州縣通共未發銀二

十三萬餘兩又湖廣米價運脚銀兩業經該省

移催均可俟後餉解到陸續覈發不致貽誤至

於兵糧江楚十一萬石俱已次第抵興

臣亦已

分撥城固洋縣西鄉石泉漢陰安康紫陽等廳  
縣存貯備供足敷散放奏入

上命軍機大臣傳諭陸有仁曰台布奏安頓各路糧  
餉一摺據稱各路鹽菜銀兩截至九月底止悉數  
找清此外各州縣應領運腳採買等項及湖廣米  
價運腳銀兩均可俟後餉解到陸續核發不至遲  
悞其兵糧亦已分撥城固等廳縣存貯備用足敷

散放等語台布自辦理糧餉以來奏報情形頗形竭蹶此次奏到之摺雖據稱足敷支放但恐台布因業經交卸故爲此言著陸有仁將現在陝省所存餉銀若干及山西節次續撥若干又甘省現已無賊存剩銀兩歸入陝省軍需者尙有若干一併詳細查通盤合計足敷幾月之用是否年內無須再撥卽行據實覆奏不可稍有隱飾朕於各路



軍餉隨時撥發從不稍有吝惜陸有仁甫經出京  
於內帑情形自所深悉此時大功將次告竣各路  
官兵分剿正當喫緊之際一切軍火糧餉更當源  
源接濟陸有仁務須悉心籌畫撙節備用勿致稍  
有缺乏

台布又奏言據石泉縣知縣李樞煥於縣屬保  
安寨盤獲逆犯李正祥一名訊據供係賊目王

萬禮徒弟本年三月內從張家營起事後又會  
合戴家營高馬等逆屢次與官兵接仗因傷害  
札總兵王萬禮將伊封爲元帥等語將該犯解  
赴漢中臣親提嚴訊逐一供認不諱臣查該犯  
跟隨賊目王萬禮屢次抗拒官兵又復戕害總  
兵大員實屬罪大惡極審明後恭請

上命飭委漢中府知府趙洵署漢中協副將馬斌將

該犯綁赴市曹寸磔梟示並設扎勒杭阿靈位  
剋取該犯心肝設祭致奠以慰忠魂奏入報

聞

十三日 王長麟奏言 臣於前月二十日自楊家

店起程鼓勵官兵由斜峪子午峪一帶兼程疾  
馳至大峪口接據探報曾芝秀股匪業已竄過  
五郎金雞河直向東趨德忠在後跟剿汪啟已

由子午峪內之夾嶺小路抄赴鎮安截擊等語  
查金雞河距鎮安不遠該匪奔竄迅速倘賊匪  
逸過鎮安則汪啟德忠兩路官兵均落賊後現  
在東西並無防兵該匪或由秋林川竄向東南  
卽達楚界或由舊縣關竄向東北卽通豫省所  
關均屬緊要臣卽由大峪口趕至藍田抄赴商  
州扼住東面要路探聽賊蹤又由金雞河斜趨

南路石泉縣屬之梧桐溝鐵爐壩一帶狂奔距

東路稍遠臣卽帶兵由商州山陽馳赴鎮安向

西南迎剿維時汪啟業經抄至鎮安之雲蓋寺

德忠亦覓捷徑抄至鎮洵交界之界牌石兩河

關等處均已抄至賊前扼要堵截適額勒登保

復派慶成及候補通判雒昂帶領兵勇由城固

洋縣入山緊追前來臣亦趕至秋林川探蹤截

剿詎該匪見四路官兵扼住要隘無路奔逃卽於二十七日由澗溝一帶連夜竄至石泉縣之梅湖江岸時總兵劉之仁遊擊李有貴聞信卽於五鼓發兵二十八日黎明趕至梅湖該匪正在試探江水淺深一見官兵卽捨命撲水由淺灘處所紛紛躡渡李有貴催兵趕殺施放鎗礮擊斃賊匪百餘人餘匪搶過漢江南岸四散奔

逃查該匪竄過南岸黑溝地方東可由牛市川  
入紫陽南可由麥子坪入西鄉現在慶成及雒  
昂均已先後跟追過江汪啟德忠亦探蹤追剿  
前往計此股賊匪自前月十三日竄過棧道遁  
入南山因官兵追截甚緊該匪晝伏老林夜出  
奔走旬餘卽逼過漢江該匪無搶掠裹脅之暇  
是以居民尚未過遭蹂躪至穆克登布等所剿

伍懷志賊匪前在畧陽碓窩石地方已與觀祥  
游棟雲所剿之小股賊匪合夥頃接穆克登布  
來信十九日酉刻在甲魚石追及賊蹤該匪依  
恃山深雪厚路徑險窄料官兵不能深入正在  
屯聚未動一見官兵趕到張皇失措時兵未到  
齊穆克登布卽先率前隊兵勇極力衝殺立斃  
賊匪百餘人生擒五十六名有大旗手梁貴探



馬頭汪世傑二名其餘俱係矛手當卽概行正  
法該匪卽由陽山溝竄赴金池院一帶係趨畧  
陽之路穆克登布俟後隊到齊亦卽緊追前進  
是現在甘境卽已肅清而陝省南山亦就寧謐  
各路官兵不致仍前牽綴所有棧內設防之兵  
均移撤漢江以南全力堵剿又接藩司溫承惠  
來稟該司帶領鄉勇在平利縣之漆扒地方截

剿龍紹周賊匪殲斃二百八十九人生擒戰手  
吳有法等七名當卽梟示該匪分股由竹溪河  
險子城向鎮平南竄該司卽在漆扒暫紮防其  
東竄務將該匪逼剿入川不令竄往楚界又據  
探報高二馬五賊股已竄入平利之大桂坪  
帶慶溥已由平利之高望山等處截擊額勒登  
保又派恒瑞楊遇春帶兵由紫陽趕赴平利洵

陽一帶迎剿是各路官兵雲集更可乘賊匪逼

至一隅聚而殲洗臣連接額勒登保來信囑臣

前赴西鄉軍營面籌一切並囑速調棧內各路

防兵前赴西鄉以便分撥防堵臣當卽飛檄各

路防兵迅速前往臣亦卽趕緊移營由漢陰石

泉一帶探迎額勒登保軍營務期協同各路官

兵竭力剿辦若能將各股賊匪卽於陝境剿滅

淨盡固可迅圖蕝事卽或不能亦務將賊匪逼  
剿入川嚴防邊境俾額勒登保得以整師前往  
一意剿洗不致有東牽西擊之虞奏入

上命軍機大臣傳諭額勒登保長麟曰長麟奏會芝  
秀一股賊匪竄過五卽直向東趨長麟帶兵馳赴  
鎮安督同各路官兵向西南迎剿賊匪無路奔逃  
搶過漢江南岸四散竄逸所奏情形與昨日額勒

登保奏報相同惟穆克登布等所剿伍懷志一股  
在甲魚石追及賊蹤奮力剿殺一節額勒登保未  
經奏及自因相隔稍遠尙未得信此股賊匪經穆  
克登布等殲斃百餘人擒獲賊目矛手五十六名  
所辦亦好現在甘境業就肅清會芝邇過漢江  
陝省南山亦就寧謐但刻下江水日見淺涸賊匪  
既可南竄亦可北竄尤不可不加意防範此時陝

省應防地方惟有漢江南岸不似從前道路綿長  
扼要堵截亦易爲力長麟現由漢陰石泉迎赴額  
勒登保軍營務將防堵事宜會商妥辦所有漢江  
南岸及南山一帶俱交長麟督飭員弁實力堵禦  
勿令賊匪復行闌入倘再任北竄過江或又逸入  
南山以內則長麟不能辭罪至曾芝秀一股前此  
翻越白家店山梁竄過棧道係由德忠防守汛地

竄越已據經畧叅奏革職當經降旨諭令額勒登保以德忠入山趕賊暫緩革審如德忠果能奮力追擊迅速剿淨尙可以功抵罪革職留營効力予以自贖之路今據長麟奏曾芝秀竄過五郎一帶時汪啟由子午峪抄赴鎮安截擊德忠祇在後跟剿是此股賊匪竟係德忠疎防縱令逸出而賊匪逃至石泉時劉之仁尙能趕上追擊德忠又不能

截住痛剿實屬有罪無功德忠著革職拏問交額  
勒登保長麒會同審訊如德忠於會芝秀逃竄時  
竟未帶兵攔截則縱賊不剿自應從重治罪倘會  
經堵截實因帶兵無多衆寡不敵以致賊匪乘夜  
奔逸德忠亦有應得之罪著卽按律定擬具奏